

07 JAN 2002

Mahathir-Pengganas

AMERIKA SENDIRI SEPATUTNYA BERTINDAK, KATA DR MAHATHIR

KUALA LUMPUR, 7 Jan (Bernama) -- Datuk Seri Dr Mahathir Mohamad hari ini berkata Amerika Syarikat sendiri sepatutnya bertindak terhadap pengganas yang melakukan serangan 11 Sept tahun lepas kerana orang yang diysaki bertanggungjawab dengan kejadian itu pernah tinggal di Amerika hampir setahun.

Perancangan untuk serangan itu juga dibuat di Amerika sendiri, kata Perdana Menteri bagi menolak andaian kononnya kejadian itu boleh dielakkan jika dua pengganas yang disyaki terlibat itu ditangkap di Malaysia ketika kedua-duanya berada di sini sebelum peristiwa itu.

Malah pengganas itu juga berada di Switzerland dan tiada tindakan diambil terhadap mereka oleh negara itu, katanya pada sidang media selepas menyampaikan ucapannya di Majlis Perdana Perkhidmatan Awam Ketiga di sini.

Dr Mahathir berkata jika Amerika Syarikat dan Switzerland sendiri tidak mengenal pasti mereka sebagai pengganas dan tidak mengambil tindakan, "macam mana kita (Malaysia) nak tahan mereka."

Beliau berkata demikian ketika diminta mengulas laporan Berita Harian Singapura minggu lepas yang memetik laporan majalah Jane's Intelligence Review bahawa serangan pengganas terhadap Amerika Syarikat pada 11 Sept lepas dapat dielakkan jika Malaysia menangkap kedua-dua pengganas yang disyaki terbabit ketika mereka berada di negara ini.

Dalam kejadian itu, pengganas-pengganas menggunakan dua pesawat penumpang yang dirampas untuk merempuh dan meranapkan menara kembar World Trade Center di New York manakala sebuah lagi pesawat penumpang yang juga dirampas telah digunakan untuk merempuh Pentagon di Washington.

Mengenai perkara lain, Dr Mahathir berkata beliau amat sedih dengan penangkapan lapan pelajar pusat pengajian tinggi tempatan yang mengaku penyokong parti pembangkang kerana didapati cuba mengintip di bilik gerakan pilihan raya Wanita Umno di Taman Perlis, Kangar semalam.

"(Saya merasa) dukacita kerana kita nasihatkan supaya penuntut tidak terlibat dengan politik, jauh sekali politik menceroboh seperti ini. Mereka membuat sesuatu yang mereka tahu adalah salah dan sepatutnya mereka tidak terlibat," katanya.

Semalam lapan pelajar itu, termasuk dua pelajar wanita berumur 20 hingga 23 tahun dari Universiti Teknologi Malaysia, Kolej Universiti Institut Teknologi Tun Hussein Onn, Batu Pahat dan Universiti Sains Malaysia, ditahan kerana menceroboh masuk ke bilik gerakan itu bagi mendapatkan maklumat mengenai persiapan jentera pilihan raya Umno untuk menghadapi pilihan raya kecil Dewan Undangan Indera Kayangan.

Pilihan raya kecil itu diadakan berikutan kematian Datuk Khor Liang Tee pada 19 Dis. Penamaan calon untuk pilihan raya itu akan diadakan Khamis ini dan jika ada pertandingan, pengundian akan diadakan pada 19 Jan.

Dr Mahathir juga menegur tindakan sesetengah akhbar yang hanya menggunakan tajuk "Lapan Pelajar Ditahan" tanpa menyertakan sebabnya kerana ini memberi implikasi yang kurang menyenangkan.

"Ini nampak tak elok. Ia memberi gambaran kita sengaja tangkap pelajar. Kita tak buat begitu," kata beliau sambil meminta akhbar supaya tidak memberi gambaran yang buruk kepada kerajaan.

Perdana Menteri juga berkata kelewatan mengeluarkan kertas putih tentang kumpulan Al-Ma'unah disebabkan oleh kes yang masih berada di mahkamah dan kerajaan tidak mahu meghina mahkamah.

Bagaimanapun, katanya, oleh kerana anggota-anggota kumpulan itu

telahpun dihukum, tindakan mengeluarkan kertas putih itu sedang dibuat.

Minggu lepas, Mahkamah Tinggi mengenakan hukuman mati terhadap tiga anggota kumpulan itu dan penjara sepanjang hayat terhadap 16 lagi kerana cuba melancarkan peperangan terhadap Yang di-Pertuan Agong.

-- BERNAMA

HK AHH MAI